

7. Item oft niet ghoet ende noodich en zij in alle Ghemeynten de prophetiën ende propositien op te richten ende eens ter weken tonderhoudene, op dat also alle jonghe predicanten beter gheoeffent ende te gheschickter mochten wordden in sulcken weerdighen ende swaeren ampt, ende op dat daer door oock alle onghereghelde ende te seer eenvuldige predicatiën mochten ghebetert wordden?

8. Item oft niet ghoet ende raetsaem en waere datmen saeghe te bekomen de punten ofte articulen, welcke nu laest verhandelt ende besloten zijn int generale Synodum, ghehouden te la Rochelle in Vranckrijck, ende sich te vergelijcken [= gelijk te maken] met den selvighen in al wat moghelijcken zij ende ons dienen mach tot opbouwinge ende bevestinge des huys Godes in dese landen?

9. Item datmen alle gheoorloefde ende bequaemste middelen wil ghedachtig zijn voor te wenden ende te ghebruycken om die vander Ausborchsche Confessiën tot ons te ghewinnen.

10. Item oft oock gheoorloeft soude wesen den ghereformeerden Christenen den naem van der Ausborchscher Confessiën te voeren.

11. Item oft niet gheraeden wesen en soude alle voortreffelijcke ende groote Steden, daer eenighe ghereformeerde kercke onder tcruys schuylen, sichtent [= sedert] de aenghevanghen groote vervolghinge des hertoghen van Alba met sijnen aenhangheren noch ghebleven oft weder opghericht is, als naemelijck Amsterdamme, Middelburch, Antwerpen, Brussel, Ghendt, Doornijcke ende meer andere, die (seggh ik) te versorghen met eenighe sonderlinghe beghaefde dienaren des Woordts, niet om meerder authoriteyt te hebben oft te ghebruyckene, maer opdat het licht, daerse de Heere sonderlinge mit verlicht ende beghaeft heeft, te beter en openbaerlijcker verschijnen mocht inden gphantssche lande ende op dat alle andere omliggende te beter daer door int ronde mochten ghedient ende sulcke ghaeven ghelijckelijcken deelachtich wordden?

12. Item indien men gheraeden vonde onderhoudt te ghevene allen predicanten, die wt gebreke, nootd ofte benautheyt ende door de seer groote tyrannie ghedwonghen zijn gheweest haeren dienst ende beroepinghe te laeten vaeren ende eenighen anderen staet aen te nemene, ende oock de selveghe te vermaenen haeren eersten roep waer te nemen, te studeren ende de H. Schrift te ondersoekene op dat sy des te bereeder ende bequaemer mochten wesen wanneer men haeren dienst in eenighe kercken van doen hadde. Item desghelijcx oock onderhoudt te ghevene ende bystandt te doene nae alle vermoghen eenighe personen die tot sulcken Ampte voors^t. alree eenighe goede ghaeven, beghinssel ende inghanck hadden, ende van ghelijcke oock eenighe jonge Studenten, het zy rycke oft arme, daermen ghoede hoepe van mocht hebben dat sy tot sulcx als voors^t. is mochten bequaem wordden, oft dan niet (seggh ik) ghoet en waere dat elcke kercke de naemen van alsulcke voors^t. personen, daer sy kennisse van mochten hebben, opteekende ende den teghenwoordighen generalen Synodo by gheschifte overghaeven ten einde als voorst. is?

13. Item oft den Consistoriis ghorloft is ende vrystaet in eenige